

TUTÚ NÍ CADÚHA TÉ PĀBLÚ QUÍHÍⁿ NDAHA ÑÁYIU ÑUÚ ÉFESÚ

**Té Pāblú cādūha-dé tutú quíhíⁿ ndaha ñáyiú xīndecu ichi Xítóhó Jesucrístú
ndécú ñuú Éfesú**

1 ¹Yúhú té Pāblú ní tendaha ñaha Yá Ndiöxí cāháⁿ-í tnúhu Xítóhó Jesucrístú núú ñáyiú, chi ducaⁿ ñí cachí Yă Ndiöxí cunduu, te vitna cādúha-í tutú-a cuendá daquixi-í ndaha nchaa nchòhó ñáyiú cùu cuendá Yă Ndiöxí xīndecu ñuú Éfesú, te diu-ni nchòhó cúú-ndó ñáyiú sàndáá iní ñáhá xii Xítóhó Jesucrístú.

²Te xicáⁿ táhù-í núú Dütú Ndiöxí Yaá cúú Tătá-ó, ndihi núú Xítóhó Jesucrístú sá ná chīndee chitúu ñaha-gă xii-ndo, te ducaⁿ ndì nduú-gá ná cādá te ío váha cuu iní-ndó cūndecu-ndo.

**Espíritú Yă Ndiöxí chíndèè ñaha-xi xii-o chi ndècu ndihi-o Xítóhó
Jesucrístú**

³Te cachí-ó să ïo cāhnu cuu Yá Ndiöxí Yaá cúú Tătá Xítóhó Jesucrístú, te ndéé andiú quide Yá Ndiöxí nchaa sá vāha sá cúú-xí-ó cuendá sá ndécú ndihi-o Espíritú-gá, te ducaⁿ quide-gá chi ndècu ndihi-o Xítóhó Jesucrístú. ⁴Te ndéé cútnàhá vátá ngăva-gá ñuyíú ñí cachí Yă Ndiöxí sá nchóó cùu-o ñáyiú cùu cuendá-gá, te ducaⁿ ñí cachí-gá sá cuendá Xítóhó Jesucrístú cuendá sá nchóó cùu-o ñáyiú ñá túú tnàhí ná cumání cundecu núú-gă, te ducaⁿ te vá cūndècu cuéchi-o. ⁵Te Yá Ndiöxí ío cùu iní ñáhá-gă xii-o ñuu xíăⁿ ducaⁿ ñí cachí-gá ndéé cútnàhá vátá ngăva-gá ñuyíú să nchóó ndùu-o déhe-gá. Te sá cuendá nchaa sá cādá Xítóhó Jesucrístú sá cúú-xí-ó, xíăⁿ ducaⁿ ñí cachí Yă Ndiöxí, te ducaⁿ ñí cachí-gá chi ducaⁿ tnàhí ní sani iní-gá cunduu. ⁶Te xíăⁿ ñuu xìni ñuhu-xi sá nchóó cāchí-ó să ïo cāhnu cuu Yá Ndiöxí, chi ío cūndahú iní ñáhá-gă chíndèè ñaha-gá xii-o. Te ducaⁿ quide-gá chi ndècu ndihi-o Xítóhó Jesucrístú Yaá ío cùu iní-gá. ⁷Te Yá Ndiöxí ío cùu iní ñáhá-gă xii-o ñuu xíăⁿ Xítóhó Jesucrístú ní sati níñí-gă te ní xíhí-gá cuendá dacăcu nihnu ñaha-gă xii-o ñuu ùhú núú ndàhú, te ducaⁿ càda cahnu iní-gá nchaa yícá cuéchi-o. ⁸Te Yá Ndiöxí ío cūndahú iní ñáhá-gă chíndèè ñaha-gá xii-o, nàcuáa ngūndecu ndihi-o nchàa sá xìní

tnùní-ó te ducaⁿ te cuu-o ñăyiu tècú tnùní. ⁹Te Yá Ndiöxí ní dánèhé ñáhá-gă xii-o nchàa sá ndúú yùhu, nchaa sá nǐ sani iní-gá cada-gá. Te ducaⁿ nǐ quide-gá chi ducaⁿ nǐ sani iní-gá cunduu. ¹⁰Te sá nǐ sani iní-gá cada-gá te dacuitíí sǎ cǎdá-gă ná sàá nduu, te na sàá nduu-áⁿ te mee-gă cada sá Xítóhó Jesucrístú quindaha-gă nchaa sá ìó andiu, ndihi nchaa sá ìó ñuyíú-a.

¹¹Te nchoo nǐ nduu táhú-ó nǐ nduu-o ñăyiu cùu cuendá Yă Ndiöxí chi ndècu ndihi-o Xítóhó Jesucrístú. Te ducaⁿ nǐ cuu chi ducaⁿ tnàhí ní sani iní Yă Ndiöxí cunduu. Te nchaandi túhú sá quidé-gă, quide-gá nàcuáa sàni iní méé-gă cunduu. ¹²Te ducaⁿ nǐ cuu cuendá sá nchǔhú ñáyiu díhna nuu nǐ sándáá iní tnúhu Xítóhó Jesucrístú cǎháⁿ-ndí sá ìo cǎhnu cuu mee Yă Ndiöxí cuendá nchaa sá vǎha quide-gá. ¹³Te nchòhó tucu cútnàhá ní xíndedóho-ndo tnúhu ndáá tnúhu sá cǎháⁿ nàcuáa naníhí tàhú-ó ní cuu ìiⁿnuu-ndo ndihi Xítóhó Jesucrístú chi ní sándáá iní-ndó-gă. Te xiǎⁿ cútnùní sá nchòhó ní nduu-ndo ñăyiu cùu cuendá Yă Ndiöxí, chi ní ngúndecu ndihi-ndo Espíritú-gá sá nǐ cachí-gá taxi-gá. ¹⁴Te sá ndécú ndihi-o Espíritú Yă Ndiöxí xiǎⁿ cútnùní sá ndàá nduu táhú-ó cùndecu-o ndihi-gá ná sàá nduu nàcuaca ñaha-gá xii nchaa nchoo ñăyiu cùu cuendá-gá, te sá dúcáⁿ cǎda-gá nǔu xiǎⁿ tàú-ó cǎchí-ó sǎ ìo cǎhnu cuu-gá.

Té Pǎblú xicáⁿ táhú-dě núú Yă Ndiöxí cuendá cue ñáyiu ndècu ichi-gá

¹⁵Te yúhú ñihí-í tnúhu sá nchòhó ìo vǎha sándáá iní-ndó Xítóhó Jesucrístú, te nchaa ñáyiu cùu cuendá Yă Ndiöxí ìo cùu iní-ndó-yu. ¹⁶Te xiǎⁿ nǔu ñá túú dàña ndeé-í ndàcáⁿ táhù-í núú-gă cuendá-ndó, te ìo xicáⁿ táhù-í ¹⁷núú Yă Ndiöxí Yaá cúú Tǎtá Xítóhó Jesucrístú cuendá-ndó. Te diu-ni Yá Ndiöxí cúú-gă Yaá ìo cǎhnu cuu. Te xicáⁿ táhù-í núú Yă Ndiöxí sá méé-gă ná cǎdá sǎ Espíritú-gá chindee ñaha-xi xii-ndo cuendá cuu-ndo ñáyiu tècú tnùní, te na cǎda-xi sá cútnùní iní-ndó nàcuáa sàni iní Yă Ndiöxí. ¹⁸Te ducaⁿ xicáⁿ táhù-í núú Yă Ndiöxí cuendá-ndó, cuendá sá nchòhó tecú tnùní-ndó nàcuáa ndùu tnúhu ndee ìní ní taxi-gá ní ngúndecu ndihi-ndo cǔtnàhá ní cǎháⁿ ñáhá-gă xii-ndo. Te ducaⁿ cùtnuní tucu iní-ndó sǎ ncháá sǎ nǐ cachí-gá taxi-gá nduu táhú nchoo cuè ñáyiu cùu cuendá-gá cúú-xí mèe cuií-ni sá ìo-gá vǎha. ¹⁹Te cùtnuní tucu iní-ndó sǎ Yă Ndiöxí ìo cǎhnu cuu-gá quidé-gă nchaa núú sǎ vǎha sá cúú-xí nchòo ñáyiu sándáá iní ñáhá xii-gá, chi quide-gá sá vǎ yòo tnàhí ndàcu cada sá cúú-xí-ó dàtná ní quide-gá ²⁰ní dándótó-gă Xítóhó Jesucrístú cútnàhá ní xíhí-gá. Te ní taxinucóo-gá Xítóhó Jesucrístú xio cùha-gá táxí tnùní-gá. ²¹Te Xítóhó Jesucrístú ìo-gá cúnùu-gá dàcúxí nchaa núú cuè espíritú, ndihi dàcúxí nchaa cue téé yìndaha ñáyiu, ndihi dàcúxí nchaa dava-gá cue téé cùnùu. Te cuèi vitna te cuèi ndéé núú cuàháⁿ núú vǎxi ducaⁿ-ni ìo cunuu-gă taxi

tnùní-gá. ²²Te mee Yă Ndiöxí ní quide-gá sá Xítohó Jesucrístú taxi tnùní-gá nchaandi túhú sá íó, te diu-ni mee Yă Ndiöxí ní cachí-gá sá ncháá ñăyiu cùu cuendá-gá quindaha ñàha Xítohó Jesucrístú. ²³Te cada iní-ó sá ncháá ñăyiu cùu cuendá Yă Ndiöxí cúŭ-yu yiqui cùñú Xítohó Jesucrístú, chi ìⁿ-ni cùú-yu ndihi-gá, te mee-gă táxí tnùní-gá nchaandi túhú sá íó.

Yá Ndiöxí ío cùndahú iní ñáhá-gă xii-o nŭu xíăⁿ ní dácăcu nihnu ñaha-gă
2 ¹Te nchòhó cúú-ndó dàtná ñáyiu ní xíhí cuendá nchaa sá cuèhé sá dúhá quide-ndo ni cuu, dico vitna cada iní-ndó sá dàtná ní ndoto-ndo chi ní nduu táhú-ndó cùndecu-ndo ndihi Yá Ndiöxí ni caa ni quíhíⁿ. ²Te ducaⁿ ñí xíndecu-ndo ìchi cuehé ichi duha, chi ní cánchezúⁿ nihnu-ndo nchàa sá cuèhé sá dúhá íó ñuyíú-a, te ní xóo cada-ndo nchàa nacuáa càháⁿ sácuíhná, te diu-ni sácuíhná-ăⁿ táxí tnùní-xi nchaa dava-gá espíritú cùndìhi-xi, te diu-ni-xi ndècu ndihi-xi nchaa ñáyiu ñá túú cuíní tniì tnúhu càháⁿ Yă Ndiöxí, te dàcaháⁿ ñáhá-xí xii-yu cuendá cundecu-ní-yu ichi cuèhé ichi duha. ³Te nchaa-o dùcaⁿ ní xóo cada-o dàtná quidé cuè ñáyiu-áⁿ, chi ní xóo cada-o nchàa sá cuèhé sá dúhá ñí xóo cani iní-ó, te nándi-gá nchaa sá cuèhé sá dúhá ñí xóo cahu iní-ó ñí xóo cada-o, núu xíăⁿ tàú-ó sá dándòho ñaha Yá Ndiöxí xii-o ni cùu datná tàú-xi dandòho-gá nchaa ñáyiu ducaⁿ ndècu ichi cuehé ichi duha-áⁿ. ⁴Te Yá Ndiöxí ío cùu iní ñáhá-gă xii-o nŭu xíăⁿ ní cundàhú iní ñáhá-gă xii-o ⁵cuèi cùu-o datná ñáyiu ní xíhí sá cuendá nchaa sá cuèhé sá dúhá quide-o ni cuu. Te ducaⁿ ñí quide-gá ní cundàhú iní ñáhá-gă xii-o cuendá cundecu-o ndihi Xítohó Jesucrístú vitna, te cuu ìⁿnuu-o ndihi-gá. Te sá cuendá-ni sá cùndàhú iní ñáhá Yă Ndiöxí xii-o xíăⁿ ní quide-gá năcuáa nchoo nàníhí tàhú-ó. ⁶Te cada iní-ó sá dàtná ní quide Yá Ndiöxí cútnàhá ní dándótó-gă Xítohó Jesucrístú cútnàhá ní xíhí-gá ducaⁿ ñí quide ñaha-gă xii-o chi ndècu-o ndihi-gá vitna. Te Xítohó Jesucrístú sa ndècu-gá andiu nŭú ndécú Yă Ndiöxí. Te cada iní-ó sá Yă Ndiöxí sa ní quide-gá sá nchóó ñí ngúndecu túu-o ndihi Xítohó Jesucrístú, chi ío váha ndècu-o vitna. ⁷Te Yá Ndiöxí quidé vâha ñaha-gă xii-o vitna cuendá sá ná sàá nduu, te diu-ni mee-gă cada te cutnùní iní nchaa ñáyiu sá ío cùu iní ñáhá-gă xii-o, te ducaⁿ ío chindee chitúu ñaha-gă xii-o cuendá sá ndécú ndihi-o Xítohó Jesucrístú. ⁸Te Yá Ndiöxí ío cùndahú iní ñáhá-gă xii-ndo nŭu xíăⁿ ní quide-gá sá nchòhó naníhí tàhú-ndó. Te ducaⁿ ñí quide-gá chi ní sándáá iní-ndó-gă. Te ñá díú sá cuendá ìⁿ chiuⁿ ni quide-ndo ducaⁿ ní nàníhí tàhú-ndó, chi mee Yă Ndiöxí ní cuíní-gá sá dícó-ni ducaⁿ nàníhí tàhú-ndó. ⁹Te mee Yă Ndiöxí ní cachí-gá sá ñà díú cuendá ìⁿ chiuⁿ quide-o naníhí tàhú-ó, te ducaⁿ ñí cachí-gá cuendá sá vă cádá càhnu-o mee-o. ¹⁰Te Yá Ndiöxí ní quide ñaha-gă xii-o dàtná ìⁿ ñáyiu saa cuendá sá ñí tnahá tnúhu-o ndihi Xítohó

Jesucristú, te ducaⁿ ñi quide-gá cuèndá sá cáda-ó mèe-ni sá vâha. Te Yá Ndiöxí ducaⁿ tnàhí ní sani iní-gá cunduu sá nchóó cùu-o ñáyiú cada mee-ni sá vâha.

Xítohó Jesucristú quidé-gă ío váha cùu iní-ó ndècu-o

11Te nchòhó chí dándàcu iní nàcuáa ní xíndecu-ndo ni cùu, chí ñá túú cùu-ndo ñáyiú isràél, te ni ñà túú quide-ndo datná quidé ñáyiú-áⁿ, chí ñáyiú-áⁿ sâha-yu señá ñii-yu, te dàquee tíhü-yu nchaa ñáyiú ñá túú ndècu señá ñii-xi. **12**Te chí dándàcu iní nàcuáa ní xíndecu-ndo, chí dàvá-áⁿ ñà túú ní xíndecu-ndo ndìhi Xítohó Jesucristú, te ni ñà túú ní xòo cuu tnahá tnúhu-ndo ndìhi ñáyiú isràél, te ni ñà túú ní xìní tnùní-ndó nàcuáa ndùu tnúhu sá ñi cáháⁿ ndáá Yá Ndiöxí nàcuáa cada váha-gá ñáyiú, te ni ñà túú ní cùu-ndo ñáyiú quindaha-gă, te ni ñà túú ní xòo níhí-ndó tnúhu ndee iní sá cùndècu-ndo ndìhi-gá. **13**Te cuèi ní cuu-ndo ñáyiú ñá túú tnàhá tnúhu ndìhi Yá Ndiöxí ní cùu, dico vitna ní tnahá tnúhu-ndo ndìhi-gá chí cùu ñiⁿnuu-ndo ndìhi Xítohó Jesucristú, cuèndá sá ñi sati níñí-gă te ní xíhí-gá te xíáⁿ ducaⁿ tnàhá tnúhu-ndo ndìhi Yá Ndiöxí vitna. **14**Te Xítohó Jesucristú ní quide-gá sá nchóó ío váha cuu iní-ó cùndecu-o, te diu-ni-gá ní quide cuèndá sá vâ dáquèe tíhü ñáhá ñáyiú isràél xii ñáyiú ñá túú cùu ñáyiú isràél, te ducaⁿ ñiⁿ-ná cuú-yu cundecú-yu. **15**Te sá ñi xíhí Xítohó Jesucristú, xíáⁿ ñá túú-gă cùnùu nchaa tnúhu sá sánú ìchi ñaha xii ñáyiú nàcuáa cáda-yu cundecú-yu ni cùu. Te ducaⁿ ñi xíhí Xítohó Jesucristú cuèndá sá cuè ñáyiú isràél ndìhi cue ñáyiú ñá túú cùu ñáyiú isràél ñiⁿ-ná cuú-yu cundecú-yu ichi-gá, te ducaⁿ te vá dáquèe tíhü tnáhá-gă-yu, te ío váha cundecu ndìhi tnàhá-yu. **16**Te ducaⁿ ñi quide Xítohó Jesucristú ní xíhí-gá núú cùrúxí cuèndá sá cuè ñáyiú cùu ñáyiú isràél ndìhi cue ñáyiú ñá túú cùu ñáyiú isràél vá dáquèe tíhü tnáhá-gă-yu. Te ducaⁿ ñi xíhí-gá cuèndá ñiⁿ-ná cuú-yu tnahá tnúhu-yu ndìhi Yá Ndiöxí nàcuáa cuu váha iní ñáhá-gă xii-yu.

17Te cuèi cùu-ndo ñáyiú ñá túú tnàhí xìní ndáá cuèndá Yá Ndiöxí ní cùu, dico Xítohó Jesucristú ní quixi-gá ñuyíú-a ní cáháⁿ-gá tnúhu váha nàcuáa ío váha cuu iní-ndó cùndecu-ndo ndìhi Yá Ndiöxí. Te diu-ni ducaⁿ ñi quide-gá sá cúu-xí nchaa ñáyiú sa xìní cuèndá Yá Ndiöxí, diu-ni ñáyiú isràél. **18**Te cuèi cùu-o ñáyiú isràél àdi ñá túú cùu-o dico diu-ni mee Xítohó Jesucristú ní quide-gá sá ncháá-ó tnàhá tnúhu-o ndìhi Dútú Ndiöxí Yaá cúu Tătá-ó. Te ducaⁿ ñi tnahá tnúhu-o ndìhi Yá Ndiöxí chí ní ngúndecu ndìhi-o Espíritú-gá. **19**Te nchòhó ñáyiú ñá túú cùu ñáyiú isràél ní cuu-ndo ñáyiú ñá túú tnàhá tnúhu ndìhi Yá Ndiöxí ní cùu, dico vitna chí ñiⁿ-ná ní cuu-ndo ndìhi nchaa dava-gá ñáyiú cùu cuèndá-gá chí cùu-ndo déhe-gá. **20**Te cada iní-ó sá cuè téé ní táuchíúⁿ Xítohó Jesucristú cáháⁿ tnúhu-gá, ndìhi cue téé

ní xóo cáháⁿ tnúhu Yá Ndiöxí ndéé sanaha cùu-güedé dàtná cimientú ìⁿ vehe, te nchòhó cúu-ndó dàtná ndóho sá sàà vehe-áⁿ, te cada tucu iní-ó sã Xítóhó Jesucrìstú cúu-gã ìⁿ yúú cúnùu cuu cimientú vehe-áⁿ. **21**Te ducaⁿ ìo váha cùu ìⁿnuu nchaa ndóho-áⁿ ndìhi yúú cúnùu-áⁿ, te ducaⁿ tucu ío váha ta quèe tnàha nchaa ndóho-áⁿ cuäsaá. Te xiãⁿ cada iní-ó sã cúu-xí vèhe Yá Ndiöxí, vehe sá ìo ní cuu íí. Te ducaⁿ sãtnahá-xi cùu nchaa ñáyi ndècu ichi Xítóhó Jesucrìstú chi ní tnahá tnúhu-yu ndìhi-gá, te ìⁿ nduu ìⁿ nduu ta cùu vii cuu váha-gá-yu núú Yã Ndiöxí cuáháⁿ. **22**Te tnàhá nchòhó ducaⁿ sãtnahá-xi cùu-ndo chi ní ngúndecu ndìhi-ndo Xítóhó Jesucrìstú, te ducaⁿ ta cùu vii cuu váha tucu-ndo núú Yã Ndiöxí cuáháⁿ, te cùu-ndo datná vehe Yá Ndiöxí chi ndècu ndìhi-ndo Espíritú-gá.

Té Pãblú yíhí dǐquí-dě cáháⁿ-dé tnúhu Xítóhó Jesucrìstú núú ñáyi ñá túú cùu ñáyi isràél

3 **1**Te yúhú té Pãblú yíhí-í vecaá sá cuendá sá càháⁿ-í tnúhu Xítóhó Jesucrìstú núú nchòhó ñáyi ñá túú cùu ñáyi isràél, núu xiãⁿ ñi cuendá-gá duha yíhí-í vecaá vitna. **2**Te nchòhó sa nàha-ndo sá Yã Ndiöxí ní cundàhú iní ñáhá-gã xii-í, te ní cachí-gá sá yúhú quíhi díquí-í cáháⁿ-í tnúhu Xítóhó Jesucrìstú núú-ndó, te cuendá sá càháⁿ-í tnúhu-gá núú-ndó te cuu-xi sá váha sá cúu-xí-ndó. **3**Te yúhú sa ní cachí tnúhu-í xii-ndo lùha nacuaa ndùu tnúhu ndùu yuhu ni cuu, sá ñí cachí tnúhu Yá Ndiöxí xii-í. **4**Te òrè dàcuaha-ndo tnúhu ndùu yuhu-áⁿ ní cùu te quiní-ndó sã yúhú tècú tnùn-í nàcuáa ndùu tnúhu-áⁿ, te tnúhu-áⁿ càháⁿ-xi cuendá Xítóhó Jesucrìstú. **5**Te tnúhu-áⁿ cúu-xí tnúhu sá vã yõo tnàhí xini ní cùu, dico cue tée ní táuchíúⁿ Xítóhó Jesucrìstú cáháⁿ tnúhu-gá, ndìhi cue tée càháⁿ nàcuáa dàcahu iní ñáhá Yã Ndiöxí ní níhí-güedě tnúhu ndùu yuhu-áⁿ, chi Espíritú Yã Ndiöxí ní xáhaⁿ-xi xii-güedé. **6**Te duha càháⁿ tnúhu ndùu yuhu-áⁿ ní cùu: “Cuèi ñáyi ñá túú cùu ñáyi isràél te cuèi ñáyi cùu ñáyi isràél dico ìⁿ-ni ndùu táhú-yu sá váha núú Yã Ndiöxí, te núu na quèndáa iní-yu tnúhu sá càháⁿ nàcuáa naníhí tàhú-yu, te ìⁿ-nã cúu-yu cundecú-yu, te ducaⁿ ìⁿ-ni cada váha ñaha Yã Ndiöxí xii-yu te núu na cundecu ndìhí-yu Xítóhó Jesucrìstú”, duha ndùu tnúhu ndùu yuhu-áⁿ ní cùu.

7Te Yá Ndiöxí ní cundàhú iní ñáhá-gã xii-í ní taxi-gá chiuⁿ quide-í càháⁿ-í tnúhu-gá, te mee-gã quidé-gã sá yúhú ndacu-í cáháⁿ-í tnúhu-gá. **8**Te nchaa ñáyi cùu cuendá Yã Ndiöxí cúu-yu ñáyi ío-gá cúnùu cada-yu chiuⁿ-gá dàcúxí yúhú, te cuèi ducaⁿ dico Yá Ndiöxí ní cundàhú iní ñáhá-gã xii-í ní taxi-gá chiuⁿ quide-í càháⁿ-í tnúhu-gá núú cuè ñáyi ñá túú cùu ñáyi isràél. Te tnúhu-gá-áⁿ càháⁿ-xi sá sũúni ìo váha cada ñaha Xítóhó Jesucrìstú xii-o. **9**Te ducaⁿ ñí cachí Yã Ndiöxí sá càháⁿ-í tnúhu-gá cuendá danèhé-í nchaa ñáyi. Te sá dánèhé-í-yu-áⁿ cúu-xí tnúhu ndùu

yuhu sá ñí sani iní-gá ndéé sanaha nàcuáa cada váha-gá cue ñáyiú. Te ndéé dàvá-áⁿ ñí quesaha ndùu yuhu tnúhu-áⁿ ní cùu. Te diu-ni-gá cúú-gă Yaá ní cadúha nchaandi túhú sá íó. **10**Te ducaⁿ ndùu yuhu tnúhu-áⁿ ní cùu cuendá sá ncháá espíritú cúnùu ndecu andiú quiní-xi vitna nàcuáa quide nchaa ñáyiú ní tuha ñaha xii Yá Ndiöxí cuendá ducaⁿ cùtnuní iní-xi sá ío váha cùtnuní iní-gá nàcuáa cada-gá. **11**Te Yá Ndiöxí ní sani iní-gá ndéé sanaha nàcuáa ní cuiní-gá cada Xítohó Jesucrístú, te ní sáá nduu ñí quide Xítohó Jesucrístú nàcuáa ní cuiní Yă Ndiöxí cada-gá. **12**Te vitna cùyii-o cáháⁿ ndihi-o Yă Ndiöxí cuendá sá ndécú ndìhi-o Xítohó Jesucrístú, te sàndáá iní-ó-gă. **13**Te núu xiăⁿ cãháⁿ-í dóho-ndo sã cuëi duha ndòho-í vitna dico vá ná túhú iní-ndó cànchicúⁿ nihnu-ndo ìchi Xítohó Jesucrístú. Te sá dúhá ndòho-í te cùu-xi sá vâha sá cúú-xí-ndó, chi cuu-ndo ñăyiú cùu cahnu núú Yă Ndiöxí.

Xítohó Jesucrístú ío cùu iní ñáhá-gă xii-o

14Te sá cuendá nchaa sá ñí sani iní Dútú Ndiöxí quidé-gă xiăⁿ yúhú ngüñí xítì-í núú-gă cáháⁿ ndihi-í-gá, te diu-ni-gá cúú Yàá cúú Tătá Xítohó Jesucrístú. **15**Te mee Yă Ndiöxí ní cachí-gá sá ncháá espíritú ndécú àndiú cunduu-xi datná ní cachí méé-gă cunduu-xi. Te ní cachí tucu-gá sá nchóó cùu-o ñáyiú, te cunduu-o dàtná cuiní méé-gă cunduu-o. **16**Te xicáⁿ táhù-í núú Dútú Ndiöxí sá Espíritú-gá ná cadá nàcuáa cuita níhí ndéé-gă-ndó quíhíⁿ cundecu-ndo ìchi-gá, te ducaⁿ xicáⁿ táhù-í núú-gă cada Espíritú-gá chi ío cãhnu cuu-gá. **17**Te xicáⁿ táhú tucu-í núú Yă Ndiöxí sá Xítohó Jesucrístú ná cùndecu ndihi ñaha-ni-gá xii-ndo chi sàndáá iní-ndó-gă, te ducaⁿ te vá dáñá ndèé-ndó ío cuu iní tnáhá-ndó. **18**Te xicáⁿ táhú tucu-í núú Yă Ndiöxí cuendá-ndó ndìhi cuendá dava-gá ñáyiú cùu cuendá-gá, cuendá sá cùtnuní iní-ndó sã sũúni cùu iní ñáhá Xítohó Jesucrístú xii-o. **19**Te duha xicáⁿ táhù-í núú Yă Ndiöxí chi cuiní-í sá ncháá-ndó tècú tnùn-í-ndó sã ío cùu iní ñáhá Xítohó Jesucrístú xii-o cuëi vá ndácú cãva-o quiní-ó nàcuáa cùu iní ñáhá-gă xii-o. Te xicáⁿ táhú tucu-í núú Yă Ndiöxí sá ío na cùndecu ndihi ñaha-gá xii-ndo, te ducaⁿ cànchicúⁿ nihnu-ndo càda-ndo nchaa nacuáa quide mee-gá.

20Te Yá Ndiöxí ío-gá vai sá ndácú-gă táxi-gă dàcúúxí sã xicáⁿ-ó nũú-gă, te cuëi ndéé nchaa sá ñà túú sàni iní-ó níhí-ó te tàxi-gá, te ducaⁿ chi mee-gă ndécú ndìhi ñaha-gá xii-o, te ndàcu-gá quidé-gă nãndi sá vâha sá cúú-xí-ó. **21**Te vitna nchaa nchoo ñăyiú ndècu ichi Xítohó Jesucrístú chí ná cãchí-ó sã ío cãhnu cuu Yá Ndiöxí, te ducaⁿ-ni cãháⁿ-ó sã ío cãhnu cuu-gá ñi caa ñi quíhíⁿ chi ndècu ndihi-o Xítohó Jesucrístú. Te ducaⁿ na cùnduu.

Espíritú Yă Ndiöxí quidé-xí cùu ìⁿnuu-o ndecu-o

4 ¹Te yúhú té Păblú yíhì-í vecaá sá cuendá Xítóhó Jesucrìstú, te càháⁿ ndàhú-í núú-ndó sã cádá văha-ndo cùndecu-ndo datná tàú-xi cada cue ñáyiu ní cáháⁿ Yă Ndiöxí cundecu ndihi-gá. Te nchòhó tnàhá-ndó cùu-ndo ñáyiu ní cáháⁿ ñáhá Yă Ndiöxí cundecu ndihi-gá. ²Te vá cádá cànnu-ndo mee-ndo, cunduu váha iní-ndó, cunduu cànnu iní-ndó, te cuu iní tnáhá-ndó nàcuáa ducaⁿ cùndee iní-ndó nũu ná cúú sã cúmăní nũú tnáhá-ndó. ³Te ío nducu ndèe-ndo cuu ìⁿnuu-ndo cundecu-ndo, chi Espíritú Yă Ndiöxí chindee ñàha-xi xii-ndo, te ducaⁿ ïo váha cuu iní-ndó cùndecu-ndo chi cùu ìⁿnuu-ndo. ⁴Te nchoo ñáyiu ndècu ichi Xítóhó Jesucrìstú ìⁿ-ni cùu-o, te ducaⁿ ìⁿ-ni Espíritú Yă Ndiöxí ndécú, te diu-ni ducaⁿ ìⁿ-ni tnúhu ndee ìní ní ngúndecu ndihi-o cùtnàhá ní cáháⁿ ñáhá Yă Ndiöxí xii-o. ⁵Te ìⁿ-ni Xítóhó Jesucrìstú ndécú tàxi tnuní ñáhá-gă xii-o, te ìⁿ-ni cùu-o sandáa iní-ó tnúhu-gá, te ìⁿ-ni nĩ sandute-o. ⁶Te ìⁿ-ni Dütú Ndiöxí cúú Yàa cúú Tátá-ó nchàa-o, te diu-gá cùnùu-gá yíndàha ñaha-gá xii-o nchàa-o. Te Yá Ndiöxí dácàháⁿ-gá iní-ó quide-o chiuⁿ-gá, te ducaⁿ ndècu ndihi ñaha-gá xii-o nchàa-o.

⁷Te nchoo ndì dííⁿ ndì dííⁿ chindee ñaha Yá Ndiöxí xii-o quide-o nacuáa ndùu chiuⁿ ní cachí Xítóhó Jesucrìstú cada-o. ⁸Te quèe ndáá-xi nàcuáa cáháⁿ-xi núú tùtú Yă Ndiöxí núú cächí-xi:

Xítóhó Jesucrìstú cuándaa-gá andiu te ío cùnuu-gá,
chi nchaa cue espíritú cúú ũhú iní ñáhá xii-gá ñá túú ní ndàcu-xi
naá ndihi ñaha-xi xii-gá,
te mee-gă ní cachí-gá nàcuáa ndùu chiuⁿ nduu táhú ìⁿ ìⁿ ñáyiu
cadá-yu.

Duha cächí-xi núú tùtú-gá.

⁹Te sá dúcáⁿ cáháⁿ-xi sá cuándaa-gá andiu xíăⁿ cútnùní iní-ó sã nĩ cuuⁿ-gá ñuyíú-a. ¹⁰Te Xítóhó Jesucrìstú ní cuuⁿ-gá ñuyíú-a, te diu-ni-gá cuándaa-gá andiu cuendá ío cunuu-gă taxi tnùní-gá nchaandi túhú sá ío. ¹¹Te ní dácăhñu-gá cue tée xínu cuechi núú-gă ìⁿ ìⁿ núú chiuⁿ cada-güedé. Te ní cachí-gá sá dăva-güedé cáháⁿ-güedé tnúhu-gá, te dăva-güedé ní cachí-gá sá căháⁿ-güedé nàcuáa dăcahu iní ñáhá Yă Ndiöxí xii-güedé. Te dăva-güedé ní cachí-gá sá cúú-güedé cue tée datècú tnúhu cue ñáyiu nàcuáa cadá-yu naníhí tàhú-yu. Te dăva-güedé ní cachí-gá sá cúú-güedé cue tée quindaha ñàha xii ñáyiu dacuàha ñaha-güedé xí-yu tnúhu-gá. ¹²Te ducaⁿ nĩ cachí-gá cada cue tée-áⁿ cuendá canu ichi-güedé cue ñáyiu cùu cuendá Yă Ndiöxí cuendá ducaⁿ ñáyiu-áⁿ nĩhí-yu nàcuáa cadá-yu chiuⁿ-gá, te ducaⁿ cuíta níhí ndéé-gă-yu cundecú-yu ichi Xítóhó Jesucrìstú. ¹³Te ducaⁿ nĩ cachí Xítóhó Jesucrìstú cunduu ndéé sáá nduu cùu ìⁿnuu-o

quindáá iní-ó tnũhu-gá, te ducaⁿ cùu ìⁿnuu-o tecú tnùnì-ó nàcuáa ndùu cuendá-gá chi diu-gá cúu-gă Déhe Yá Ndiöxí, te cuu-o ñăyiu ío quide ndáá dàtná quidé mèe Xítohó Jesucrìstú. Te ducaⁿ te ñá túú tnàhí-gá ná cùmánì-ó nũú Yă Ndiöxí. ¹⁴Te ducaⁿ te vâ cúu-gă-ó dàtná cue landú vátá cútnùnì váha-gá iní-xi, te ni vâ cáda-gă-ó dàtná quidé ndùte lamár, chi ndute-áⁿ òré quéné tächí te cuáháⁿ-xi duha cuáháⁿ-xi dàcáⁿ, te ducaⁿ chi vâ quindáá-gá iní-ó tnũhu càháⁿ nchaa ñăyiu dândahú ñáhá xii-o, chi ñăyiu-áⁿ ïo váha xitó-yu nàcuáa dandàhú ñáhă-yu xii-o chi càchí-yu sá càháⁿ-yu tnúhu Yá Ndiöxí dico ñá ndáá. ¹⁵Te nchoo ïo cuu iní tnáhá-ó, te vâ dándàhú tnáhá-ó, chi cáháⁿ-ó mèe-ni sá ndáá. Te xini ñuhu-xi sá ìⁿ nduu ìⁿ nduu cuita cada ndáá-gá-ó quíhíⁿ dàtná quidé ndáá mée-gă, te diu-ni-gá cúu-gă Yaá cúnùu cuu díhna tàxi tnunì ñáhá-gă xii-o. ¹⁶Te diu-ni Xítohó Jesucrìstú quidé ñàha-gá xii nchaa nchoo ñăyiu ndècu ichi-gá dàtná yiqui cùñú mée-gă, chi ìⁿ yiqui cùñú ío váha ní quée tnàha ìⁿ ìⁿ xichi, te ducaⁿ yìhì túchi yiqui cùñú-ăⁿ yótnì-xi nchaa nacuáa ní quée tnàha. Te ducaⁿ sãtnahá-xi cùu nchoo chi ìⁿ-ni cùu-o ndecu-o ichi Xítohó Jesucrìstú táxi tnùnì ñáhá-gă xii-o. Te núu nchoo quide-o nchaa nacuáa tàú-xi cunduu te cùu iní tnáhá-ó, te ducaⁿ ta ñihí ndée-gă-ó cuáháⁿ ndécú-ó ìchi-gá.

Vá cáda-gă-ó dàtná ní xóo cada-o cùtnàhá ní xíndecu-o ìchi cuehé ichi duha

¹⁷Te vitna yúhú càháⁿ-í dóho-ndo quide-í núu Xítohó Jesucrìstú sá vâ cùndècu-gá-ndó dàtná xíndecu ñăyiu ñá túú sàndáá iní ñáhá xii Yá Ndiöxí, chi nchaa ñăyiu-áⁿ ñà túú vèdana nàndíhi nchaa sá sání ìní-yu. ¹⁸Te ni ñà túú vèdana cùtnunì iní-yu nàcuáa ndùu tnúhu ndáá tnúhu Yá Ndiöxí. Te ñăyiu-áⁿ ñà túú ndùu táhũ-yu cundecú-yu nàcuáa cuinì Yă Ndiöxí, chi ñá túú vèdana tècú tnùnì-yu te ducaⁿ chi ío sàá iní-yu. ¹⁹Te ñá túú tnàhí-gá ná sání ìní-yu ndècú-yu ichi cuehé ichi duha, te ío cùdíhí ìní-yu ndècú-yu ichi díhí ìní, te ñá díú-ní xǎⁿ chi nándi-gá nchaa sá cuehé sá dúhá quidé-yu ndècú-yu. ²⁰Dico tnúhu Xítohó Jesucrìstú sá ñí sàndáá iní-ndó chi ñá túú dùcaⁿ sanu ichi ñaha-xi xii-ndo cada-ndo. ²¹Te nchòhó ní cutnùnì iní-ndó nàcuáa ndùu cuendá Xítohó Jesucrìstú, te dàcuaha-ndo tnúhu ndáá diu-ni tnúhu-gá nàcuáa ndècu-ndo ichi-gá. ²²Te vitna vâ cání-gă iní-ndó càda-ndo datná ní xóo cada-ndo cùtnàhá ní xíndecu-ndo ìchi cuehé ichi duha, chi núu nchaa-ni sá cuehé sá dúhá-ăⁿ ná cùhuⁿ-ni iní-ndó càda-ndo, te uuⁿ-gá uuⁿ-gá cuita dacuítá nihnu ñaha-xi xii-ndo quíhíⁿ, chi núu nchaa-ni sá cuehé sá dúhá-ăⁿ ná cùhuⁿ-ni iní-ndó te dàticá nuu ñaha-xi xii-ndo. ²³Te nchòhó, xini ñuhu-xi sá vâ dúcáⁿ-gă cani iní-ndó càda-ndo te tàú-ndó ndùu-ndo datná ìⁿ ñăyiu ní cacu túu saa. ²⁴Te nduu iní-ndó dàtná cuinì mée Yă Ndiöxí cunduu, chi nduu-xi nàcuáa càa iní mée-gă, te ducaⁿ te

cuu-ndo ñăyiu ío váha cada ndáá, te cuu ndisa-ndo ñăyiu ñá túú tnàhí ná cumání cundecu núú-gă.

25Te cuendá xíăⁿ nũu cãháⁿ-í dóho-ndo sã nchòhó vá dáciuandehnde-gá-ndó dàtná ní xóo cada-ndo, te mee-nă sá ndàá cãháⁿ ndihí tnàha-ndo, chi ìⁿ-ni cùu-o ndecu-o ichi Xítóhó Jesucrìstú.

26Te núu cùdéeⁿ-ndó te cada cuendá-ndó sã vã cádá-ndó ìⁿ cuéchi sá dúcáⁿ cùdéeⁿ-ndó, te vá dúcáⁿ-ní cùhuⁿ iní-ndó tnũhu sàtú iní-áⁿ. **27**Te vá dãná-ndó mèe-ndo dandahú ñáhá sàcuíhná xii-ndo.

28Te núu dava-ndo cùu-ndo ñadúhú te vá dúcáⁿ-gă cada-ndo, chi nducu-nă-ndó ìⁿ chiuⁿ váha cada-ndo nàcuáa ducaⁿ ñhí-ndó sã chíndèe-ndo cue ñáyiu ndàhú ñáyiu ñá túú nă ndécú ndihí.

29Te vá cãháⁿ-gá-ndó nì ìⁿ tnũhu cuèhé, chi mee-nă tnũhu vii tnũhu váha cãháⁿ-ndó nàcuáa ducaⁿ ngũnu ichi cue ñáyiu ndèdóho ñaha xìi-ndo, te núu ducaⁿ na càda-ndo te cuu-xi sá vãha sá cúú-xí ñáyiu ducaⁿ ndèdóho ñaha xìi-ndo-áⁿ. **30**Te vá cádá-gă-ndó nì ìⁿ sá ñá túú tàú-ndó càda-ndo cuendá sá vã dándìhú-ndó iní Espíritú Yă Ndiöxí, chi ñi Espíritú-gá ndécú ndihí-ndo, te xíăⁿ cútnùnì iní-ndó sã sàá nduu nàcuaca ñaha-gá xii-ndo cundecu-ndo ndihí-gá ni caa ni quíhíⁿ.

31Te vá dásàtú-gá-ndó iní tnàha ñáyiu-ndo, te ni vã cúhúⁿ iní-ndó tnũhu sàtú iní, te ni vã cùdéeⁿ-gă-ndó, te cuèi núu chítú nũú tàcá vá cãháⁿ cana-ndo cùcuèhé-ndó tnàha ñáyiu-ndo, te ni vã cuátnũhu-ndo tnaha ñáyiu-ndo, te ni vã cánì cuèhé canì duha iní-ndó cuendá tnàha ñáyiu-ndo.

32Te cundàhú iní tnáhá-ndó, te cada tnàha-ndo sá vãha, te cada cãhnu iní tnáhá-ndó nũu ná cúú sã cúmăní nũú tnáhá-ndó dàtná ní quide Yă Ndiöxí ní quide cãhnu iní-gá nchaa yíca cuèchi-ndo sã cuendá Xítóhó Jesucrìstú.

Nàcuáa tàú-xi cundecu nchaa ñáyiu cùu déhe Yă Ndiöxí

5 **1**Te nchòhó cúú-ndó ñáyiu ío cùu iní ñáhá Yă Ndiöxí, te ñi déhe-gá cúú-ndó nũu xíăⁿ xínì ñũhu-xi canchicúⁿ nihnu-ndo càda-ndo datná quidé mèe-gá. **2**Te ío cuu iní tnáhá-ndó cundecu-ndo datná cúú iní ñáhá Xítóhó Jesucrìstú xii-ndo, chi ñi-gá ní cachí-gá sá cúú-gá cuendá nchaa cuéchi-o te ní xíhí-gá, te sá dúcáⁿ ñí xíhí-gá te ní cuu-gá dàtná ìⁿ táhú sã cúú-xí Yă Ndiöxí, te ío váha ní cuu iní Yă Ndiöxí sá dúcáⁿ ñí quide-gá.

3Te sá cuendá sá nchòhó cúú-ndó ñáyiu cùu cuendá Yă Ndiöxí nũu xíăⁿ nchaa nchòhó cue tée vá cãháⁿ ndihí-ndo ñáyiu ñihí te núu ñá díú ñàdihí-ndó cùú-yu, te ducaⁿ-ni nchàa nchohó cue ñáyiu ñihí tucu vá cãháⁿ ndihí-ndo cuè tée te núu ñá díú yìi-ndo cuu-güedé, te ni vã cánì tnàhí iní-ndó cundecu-ndo ichi díí iní, te ni vã xíhó-ndó nì ìⁿ sá ndécú ndihí tnaha ñáyiu-ndo, te ni ìⁿ nchaa xíăⁿ vá cánì iní-ndó càda-ndo, te ni vã cácu nèhe-ndo. **4**Te ni vã cãháⁿ-ndó ìⁿ tnũhu sá ni vã cúú cundèdóho ñáyiu, te

ni vǎ cǎháⁿ-ndó ìíⁿ tnúhu cùtexínu, te ni dǎva-gǎ nchaa tnúhu sǎ ñà túú vǎdana nǎndíhi vǎ cǎháⁿ-ndó, chi nchaa tnúhu-áⁿ ñà túú tàú-xi cǎháⁿ-ndó, te xini ñuhu-xi sǎ vǎha-gǎ sǎ ndàcáⁿ táhú-ndó nǔú Yǎ Ndiǒxí cuendá nchaa sǎ vǎha quǐde-gǎ. ⁵Te nchòhó sa xini ndáá-ndó sǎ ncháá cuè tée cǎháⁿ ndíhi ñáyiú dǐhí te ñá díú ñàdihí-güedé cúü-yu, ndíhi cue ñáyiú dǐhí cǎháⁿ ndíhi cue tée te ñá díú yǐ-yu cùu-güedé, nchaa ñáyiú-áⁿ vǎ ndúú tǎhǔ-yu cundecú-yu núú ndécú Yǎ Ndiǒxí ndíhi Xítóhó Jesucrístú táxí tnùnǐ-gǎ. Te ni cuè ñáyiú xǐndecu ichi díí iní, te ni cuè ñáyiú xìho nchaa sǎ ndécú ndíhi tnaha ñáyiú-xi vǎ ndúú tǎhǔ-yu cundecú-yu ndíhi-gǎ núú ndécú-gǎ táxí tnùnǐ-gǎ. Te tnúhu sǎ cǎchí-ó xìho-o nchaa sǎ ndécú ndíhi tnaha ñáyiú-o, ìíⁿ-ni cùu-xi ndíhi tnúhu sǎ cǎchí ñáyiú quǐde cahnú-yu nchaa sǎ cǎchí-yu cùu ndiǒxí te ñá ndàá sǎ ndiǒxí cúú-xí. ⁶Te vǎ quǐndáá iní-ndó ni ìíⁿ tnúhu sǎ ñà túú nǎndíhi cǎháⁿ ñáyiú, chi ñáyiú-áⁿ ìo dandòho ñaha Yǎ Ndiǒxí xii-yu cuendá nchaa sǎ cuèhé sǎ dúhá quǐdé-yu chi ñá túú sàndáá iní ñáhǎ-yu xii-gǎ. ⁷Núú xǐǎⁿ cǎháⁿ-í dóho-ndo sǎ vǎ ñihí tnáhá-ndó ndíhi cue ñáyiú-áⁿ.

⁸Te nchòhó ní cuu-ndo dàtná cue ñáyiú ní xǐndecu núú néé chi ní xǐndecu-ndo ìchi cuehé ichi duha, dico vitna ní ngúndecu-ndo ìchi Xítóhó Jesucrístú, te ñá túú-gǎ ndécú-ndó nǔú néé dàtná ní xǐndecu-ndo ni cùu. Te vitna cada-ndo nchàa nacuáa tàú-xi cunduu chi ndècu-ndo ichi-gǎ. ⁹Te sǎ cuendá sǎ ndécú-ndó ìchi-gǎ nǔú xǐǎⁿ cúú-ndó ñáyiú váha, te quǐde ndáá-ndó ndècu-ndo, te ñá túú dàcuandehnde-ndo chi cǎháⁿ-ndó mèe-ni sǎ ndàá. ¹⁰Te ío váha cada cuendá-ndó nchàa sǎ cúú vǎha iní Xítóhó Jesucrístú, te xǐǎⁿ cada-ndo. ¹¹Te vǎ cǎnchǐcúⁿ nihnu-ndo tnàhá-ndó càda-ndo datná quǐdé cuè ñáyiú ndècu ichi cuehé ichi duha, chi nchòhó tàú-ndó cǎháⁿ-ndó dǒho nchaa ñáyiú ducaⁿ ndècu ichi cuehé ichi duha-áⁿ cuendá nchaa sǎ quǐdǎ-yu. ¹²Te cucahaⁿ núú-ndó vǎ cǎháⁿ-ndó cuendá ni ìíⁿ sǎ cuèhé sǎ dúhá quǐde dayuhu nchaa ñáyiú-áⁿ. ¹³Dico òré dǎndixi túú tnúhu Yǎ Ndiǒxí iní-yu nàcuáa quǐdé-yu te cùtnuní iní-yu sǎ ñà túú quǐde váha-yu, te ducaⁿ ndìxi cuéchi iní-yu cuendá nchaa sǎ cuèhé sǎ dúhá quǐdé-yu. ¹⁴Te núú tütú Yǎ Ndiǒxí cǎchí-xi:

Nchòhó cúú-ndó dàtná ñáyiú xidí, te vitna ndiquíú iní-ndó,
te cùu tucu-ndo datná ñáyiú ní xíhí, te vitna ndoto-ndo,
te Xítóhó Jesucrístú chindee ñàha-gǎ xii-ndo nàcuáa vǎ
cúndècu-gǎ-ndó ìchi cuehé ichi duha.

Duha cǎháⁿ-xi núú tütú-gǎ.

¹⁵Te ío váha cada cuendá-ndó nàcuáa cada-ndo cùndecu-ndo, te vǎ cáda-ndó dàtná xǐquide cue ñáyiú ñà túú tècú tnùnǐ, chi cada-ndo dàtná xǐquide ñáyiú ío váha sàá díquí-xi. ¹⁶Te ìíⁿ nduu ìíⁿ nduu cani iní-ndó càda-ndo nchaa nacuáa tàú-xi cunduu, chi vitna ío cùnuu nchaa sǎ cuèhé

sá dúhá. **17**Te cuu-ndo ñáyiú tècú tnùnì cuèndá ducaⁿ cùtnunì iní-ndó nàcuáa cuinì Yá Ndiöxí cada-ndo, te vá cádá-ndó dàtná xíquide cue ñáyiú ñá túú tnàhí cùtnunì iní-xi nàcuáa cuinì Yá Ndiöxí cada-yu. **18**Te vá cúú-ndó ñáyiú quihu chi núu ducaⁿ na càda-ndo te dàcuíta nihnu-ndo mèe-ndo, te dañá-ndo mèe-ndo sá Espíritú Yá Ndiöxí ná tàxi tnunì ñáhá-xí xii-ndo. **19**Te cáháⁿ-ndó nàcuáa-ni cuáháⁿ ndudú sá ñí xóo cata nchaa cue ñáyiú ndéé sanaha ñí xóo chiñuhú-yu Yá Ndiöxí. Te cáháⁿ-ndó nàcuáa cuáháⁿ ndudú sá chíñuhu-ndo Yá Ndiöxí, te cata-ndo. Te cuèi nchaa dava-gá ndudú diu-ni ducaⁿ cáháⁿ-ndó te cata-ndo. Te ni yùhu ni iní-ndó càta-ndo nchaa ndudú-áⁿ chíñuhu-ndo Yá Ndiöxí. **20**Te vá dáñá ndèé-ndó ndàcáⁿ táhú-ndó núú Tátá-ó Dütú Ndiöxí cuèi ndècu váha-ndo àdi ñá túú ndècu váha-ndo. Te ducaⁿ càda-ndo chi ndècu ndihi-ndo Xítóhó Jesucrìstú.

Tàú-xi sá quèndáá iní tnáhá cuè ñáyiú ndècu ichi Xítóhó Jesucrìstú

21Te nchòhó ñáyiú ndècu ichi Xítóhó Jesucrìstú tàú-xi sá quèndáá iní tnáhá-ndó, te ducaⁿ càda-ndo chi nèhe-ndo sá yíñuhu núú Yá Ndiöxí.

22Te nchaa nchòhó ñáyiú òhí ndécú yìi-xi, xini ñuhu-xi sá quèndáá iní-ndó yìi-ndo datná sàndáá iní-ndó Xítóhó Jesucrìstú. **23**Chi yìi-ndo tàxi tnunì ñáhá-güedë xii-ndo dàtná quidé Xítóhó Jesucrìstú táxi tnùnì ñáhá-gá xii nchoo cuè ñáyiú ndècu ichi-gá. Te diu-gá cúú-gá Yaá ní dácäcu nihnu ñaha xii-o núú ùhú núú ndàhú, te cùu-o datná yiqui cùñú-gá. **24**Te dàtná quidé nchòhó ñáyiú ndècu ichi Xítóhó Jesucrìstú sàndáá iní-ó tnèi-o nchaa tnúhu càháⁿ-gá, ducaⁿ tàú-xi cada nchaa nchòhó ñáyiú òhí quèndáá iní-ndó tnèi-ndo nchaa tnúhu càháⁿ yìi-ndo.

25Te tnáhá nchaa nchòhó cue téé tucu tàú-xi sá ïo cuu iní-ndó ñàdihí-ndó dàtná quidé Xítóhó Jesucrìstú cúú iní ñáhá-gá xii nchaa nchoo ñáyiú ndècu ichi-gá, chi mee-gá ní xihí-gá sá cuèndá-ó sá cúú iní ñáhá-gá xii-o. **26**Te ducaⁿ ñí quide-gá cuèndá sá ncháá ñáyiú vitna ngündecu ichi-gá cuu yíñuhú-yu núú Yá Ndiöxí, te ducaⁿ ndàda ndoo ndada nine-gá iní-yu sá cuèndá sá quèndáá iní-yu tnúhu Yá Ndiöxí, te cuanduté-yu. **27**Te ducaⁿ ñí quide-gá cuèndá sá ncháá ñáyiú na ngündecu ichi-gá ío váha cundecú-yu núú-gá, te ducaⁿ vā cündècu-gá ni ìⁿ cuéchi-yu núú-gá, te ni ìⁿ-gá sá ñà túú-gá ná cumání-yu núú-gá chi ío cundecu yíñuhú-yu. **28**Te sá dúcáⁿ quide Xítóhó Jesucrìstú sá cúú-xí cuè ñáyiú ndècu ichi-gá, xíáⁿ tàú-xi sá nchòhó cue téé xíndecu ñàdihí-xi cuu iní-ndó ñàdihí-ndó, te coto-ndö-yu dàtná xító-ndó yiqui cuñú méé-ndó, te cada iní-ndó sá ncháá cuè téé ío cùu iní ñàdihí-xi cùu iní-güedé méé-güedë chi ìⁿ-ná cúú-yu. **29**Te nchoo sà naha-o sá ni ìⁿ ñáyiú ñá túú dàquee tíhü-yu yiqui cùñú-yu, chi da uuⁿ-gá chíndéé-yu te xító-yu. Te diu-ni ducaⁿ quide Xítóhó Jesucrìstú ndihi nchaa ñáyiú ndècu ichi-gá, **30**chi cùu-o datná yiqui cùñú méé-gá, te ducaⁿ chi

iiⁿ-ni cùu-o ndihi-gá. ³¹Te tnúhu Yá Ndiöxí cächí-xi: “Sá cuèndá xiáⁿ nũu nchaa cue tée na nihí ñadìhí-xi te diiⁿ-ná cada-güedé tătă-güedě ndihi náná-güedě, te ñadìhí-nă-güedé cuu cuu ndihi-güedé, te ducaⁿ iiⁿ-ná cuu-güedé ndihí-yu”, duha cächí-xi. ³²Te tnúhu-a cùu-xi iiⁿ tnúhu cànhu vihi, te ducaⁿ sã tnàhá-xi cùu Xítóhó Jesucrìstú ndihi cue ñáyiu ndècu ichi-gá. ³³Te cãháⁿ-ni tucu-í dóho nchaa nchòhó cue tée xĩndecu ñadìhí-xi sá ïo cuu iní-ndó ñadìhí-ndó te coto-ndö-yu dàtná xító-ndó mèe-ndo, te ducaⁿ-ni nchàa nchòhó ñáyiu dihi tucu canehe-ndo sã yĩñùhu núú yii-ndo.

6 ¹Te nchaa nchòhó cue landú, quindáá iní-ndó tătă-ndó ndihi náná-ndó chi ducaⁿ cuiní Yă Ndiöxí cunduu, te diu ducaⁿ tnàhí tàú-xi cada-ndo. ²Te Yá Ndiöxí ní cachí-gá sá cãnehè-ndo sá yĩñùhu núú tătă-ndó ndihi núú náná-ndó. Te tnúhu-áⁿ cúú-xí tnũhu cùnuu ní cãháⁿ-gá cada cue ñáyiu cuèndá cada váha ñaha-gă xií-yu. ³Te ní cachí-gá sá nũu ducaⁿ na càda-ndo te ío váha cundecu-ndo, te ducaⁿ ïo naha cùdíi-ndo cùndecu-ndo ñuyíú-a.

⁴Te nchaa nchòhó cue tée cùu tătă, vá dásatú-ndó ìní cue déhe-ndo chi canu ichi-ndo-güèxi nacuáa tàú-xi cunduu, te dacuàha-ndo-güèxi nchaa tnúhu váha nàcuáa cuiní Yă Ndiöxí cunduu.

⁵Te nchaa nchòhó cue ñáyiu xĩnu cuechi, quindáá iní-ndó cuè ñáyiu dii chiúⁿ-xi quide-ndo, te canehe-ndo sã yĩñùhu núú-yu, te ío váha cuu iní-ndó càda-ndo chiúⁿ-yu, te ducaⁿ nì yuhu nì iní-ndó càda-ndo. Te cada iní-ndó sã dàtná tnúhu sá chíúⁿ Xítóhó Jesucrìstú quidé-ndó. ⁶Te dava ñáyiu xĩnu cuechi, mee-ni òré ndéhé ñáyiu dii chiúⁿ-xi quidé-yu ío ndècu ndeé-yu quide chiuⁿ váha-yu cuèndá cuiní-yu cudùú-yu. Dico nchòhó vá dúcáⁿ càda-ndo, chi cuèi ndècu ñáyiu dii chiúⁿ-xi quide-ndo àdi ñá túú-yu dico cada chiúⁿ váha-ni-ndo, te cada iní-ndó sã dàtná tnúhu sá chíúⁿ Xítóhó Jesucrìstú quidé-ndó, te cada-ndo nì yuhu nì iní-ndó nàcuáa cuiní Yă Ndiöxí cunduu. ⁷Te ío váha cuu iní-ndó càda-ndo chiúⁿ-áⁿ, chi cada iní-ndó sã dàtná tnúhu sá chíúⁿ Xítóhó Jesucrìstú quidé-ndó te ñá díú chiúⁿ cue ñáyiu ñuyíú-a. ⁸Te nchòhó sa cùtnuní iní-ndó sã nàcuáa ndùu chiúⁿ váha ní quide-ndo iiⁿ iiⁿ-ndo, te ducaⁿ cùnduu sá táxí Xítóhó Jesucrìstú nduu táhú-ndó cuèi cùu-ndo ñáyiu dàñá queé nũú chíúⁿ pàtróóⁿ-xi àdi cuu-ndo ñáyiu ñá túú tnàhí dàñá quee núú chíúⁿ pàtróóⁿ-xi.

⁹Te nchaa nchòhó ñáyiu xĩndecu ndihi ñáyiu xĩnu cuechi, tnàhá-ndó tàú-ndó càda váha-ndo sã cúú-xí cuè ñáyiu xĩnu cuechi núú-ndó, te vá cùndùu nínu iní-ndó nũú-yu, te chí cuàha cuèndá sá díú-ní Xítóhó Jesucrìstú Yaá ndécú àndiu taxi tnuní ñáhá-gă xii-ndo ndihí-yu, te sá cúú-xí mèe-gá chi iiⁿ-ni cùu-ndo núú-gă, te iiⁿ-ni càda ñaha-gă xii-ndo.

Yá Ndiöxí chándèe-gá cue ñáyiú ndècu ichi-gá cuèndá sá vǎ ndácú sàcuíhná nàá ndìhi ñaha-xi xii-yu

10Te vitna nchaa nchòhó ñáyiú ndècu ndìhi-í ichi Xítóhó Jesucristú càchí tnúhu-í xii-ndo sǎ ïo nducu-ndo nàcuáa cada-ndo ñíhí ndéé-ndó cùu ìíⁿnuu-ndo ndìhi Xítóhó Jesucristú, chi mee-gǎ ío càhnu cuu-gá, te chindee ñàha-gá xii-ndo. **11**Te ñiú-ni nchaa sá ñí nduu táhú-ndó nǔú Yǎ Ndiöxí ñiú-ni nchaa xiǎⁿ cuhuⁿ iní-ndó, chi xiǎⁿ chindee ñàha-xi xii-ndo ñíhí ndéé-ndó cùndecu-ndo cuèndá sá vǎ dándàhú ñáhá sàcuíhná xii-ndo. **12**Chi nchoo ñà díú cuè ñáyiú ñuyíú-a nàá ndìhi-o, chi ndìhi cue espíritú cùndìhi yucu ñávǎha, te ñiú-ni nchaa espíritú-áⁿ cùnùu-xi cuéi núú ñínu quède-xi nchaa sá cuèhé sá dúhá, te ñiú-ni-xi cùnùu-xi ñuyíú-a sànu ichi-xi cue ñáyiú quèdé-yu nchaa sá cuèhé sá dúhá. **13**Te ío cuhuⁿ iní-ndó nchaa sá ñí nduu táhú-ndó nǔú Yǎ Ndiöxí cuèndá ducaⁿ ñíhí ndéé-ndó cùndecu-ndo, te vǎ ndácú yùcu ñávǎha ná cada ñaha-xi xii-ndo oré cuìní-xi coto ndéé ñáhá-xí. Te sátá ná dàquee tíhú-ndó yùcu ñávǎha te ñíí-ni cunduu-ndo cùndecu-ndo ichi Yá Ndiöxí. **14**Te ducaⁿ cùndecu-ni-ndo ichi Yá Ndiöxí cada-ndo dàtná xíquide cue sandàdú, chi cue téé-áⁿ ïo ñíí xíndáa-güedé. Te cáháⁿ-ndó mèe-ni tnúhu ndáá tnúhu Yá Ndiöxí, te cuu-ndo dàtná cue sandàdú cue téé ndàda tii xití-xi òré quíhíⁿ-güedé nàá-güedé. Te ducaⁿ sǎtnahá-xi cuu-ndo te núu na càháⁿ-ndó mèe-ni tnúhu ndáá tnúhu Yá Ndiöxí. Te cada ndáá-ndó cùndecu-ndo ichi-gá, te cuu-ndo dàtná cue sandàdú cue téé xixíhnu sá yídǎhu ñaha xii-güedé òré nàá-güedé cuèndá sá vǎ ñícuèhé-güedé. Te ducaⁿ sǎtnahá-xi cuu-ndo te núu na càda ndáá-ndó cùndecu-ndo ichi-gá. **15**Te cundecu túha-ndo cǎháⁿ-ndó tnúhu Xítóhó Jesucristú, tnúhu sá càháⁿ nàcuáa cuu váha iní ñáyiú cundecú-yu, te cuu-ndo dàtná cue sandàdú cue téé ndíhu zapátú-xi quíhíⁿ-güedé nàá-güedé. Te ducaⁿ sǎtnahá-xi cuu-ndo te núu na cùndecu túha-ndo cǎháⁿ-ndó tnúhu Xítóhó Jesucristú núú ñáyiú. **16**Te càchí tnúhu tucu-í xii-ndo sǎ ïo quíndáá iní-ndó Yǎ Ndiöxí cuèndá sá vǎ ndácú sàcuíhná nǎ cada ñaha-xi xii-ndo, te ducaⁿ te cuu-ndo dàtná cue sandàdú cue téé xínehe vítú chínèe-güedé sáquídáhu ñaha-xi xii-güedé cuèndá sá vǎ cuìcúⁿ-güedé sá nchìcúⁿ ñuhú téé ñàha cue téé nàá ndìhi-güedé. Te ducaⁿ sǎtnahá-xi cuu-ndo te núu na quíndáá iní-ndó Yǎ Ndiöxí. **17**Te ío cuhuⁿ iní-ndó sǎ ñí naníhí tàhú-ndó, te cuu-ndo dàtná cue sandàdú cue téé ñíhu mbelú cáxíⁿ. Te ducaⁿ sǎtnahá-xi cuu-ndo te núu na cùhuⁿ iní-ndó sǎ ñí naníhí tàhú-ndó. Te ío cuhuⁿ iní-ndó tnúhu Yá Ndiöxí, chi tnúhu-áⁿ ñí taxi Espíritú-gá ndécú ndìhi-ndo chindee ñaha-xi xii-ndo, te cuu-ndo dàtná cue sandàdú cue téé xínehe machití cuáháⁿ-güedé nàá-güedé. Te ducaⁿ sǎtnahá-xi cuu-ndo te núu na cùhuⁿ iní-ndó tnúhu Yá Ndiöxí. **18**Te vǎ dáñá ndéé-ndó cǎháⁿ

ndihi-ndo Yă Ndiöxí nàcuáa chindee ñaha Espiritú-gá xii-ndo, te cǎcǎⁿ táhú-ndó nǔú-gǎ nǔú ná cuiní-ndó, te ío cundecu túha-ndo cǎháⁿ ndihi-ndo-gǎ, te vá nátùhú iní-ndó cǎcǎⁿ táhú-ndó nǔú-gǎ cuendá nchaa dava-gá cue ñáyiú cùu cuendá-gá. ¹⁹Te tnàhá cuendá-í cǎcǎⁿ táhú-ndó nǔú Yă Ndiöxí cuendá sá ná chindee ñaha-gá xii-í níhì-í tnúhu cǎháⁿ-í òré cǎháⁿ-í tnúhu-gá, te ducaⁿ vǎ yùhú-í cǎháⁿ-í nàcuáa ndùu tnúhu sá cǎháⁿ nàcuáa naníhí tàhú-ó nǔú ñǎyiú tnúhu sá vǎtá cùndèdóho-gá-yu. ²⁰Te Yă Ndiöxí ní cachí-gá sá yùhú cuu-í ìⁿ tée cada-í núú-gǎ cǎháⁿ-í tnúhu-gá núú ñǎyiú, te diu cuendá tnúhu-áⁿ yíhì-í vecaá vitna. Te ío cǎcǎⁿ táhú-ndó nǔú Yă Ndiöxí cuendá-í cuendá sá yùhú cuyii-í ni yùhu ni iní-í cǎháⁿ-í tnúhu-gá núú ñǎyiú nàcuáa tàú-xi cunduu.

Tnúhu ndéé núú nǐ ndihi-ná

²¹Te té Tìquicú tée ío cùu iní-í ndécú ndihi-o ichi Xítóhó Jesucrìstú cúú-dě ìⁿ tée ío váha quide ndáá xínú cuèchi-dé núú Xítóhó Jesucrìstú, tée-áⁿ cachí tnúhu-dé xii-ndo nàcuáa cùu ndecu-í ndihi nchaa nàcuáa quide-í cuendá ducaⁿ cùtnuní iní-ndó. ²²Te cuendá xǎⁿ nǔú cuiní-í tendaha-í-dé quixi-dé núú ndécú-ndó cuendá cachí tnúhu-dé xii-ndo nchàa nacúáa cùu ndecu-ndí iha, te ducaⁿ tàxi-gá-dé tnúhu ndee ìní cundecu ndihi-ndo.

²³Te xìcǎⁿ táhù-í núú Tǎtá-ó Dǔtú Ndiöxí ndihi núú Xítóhó Jesucrìstú sá ncháá nchòhó ñáyiú ndècu ndihi-í ichi-gá sá òú-gá ná cǎdá te ío váha cuu iní-ndó cùndecu-ndo, te ducaⁿ ò cuu iní tnàhá-ndó, te ío quindáá iní-ndó-gǎ. ²⁴Te nchòhó ío cùu iní-ndó Xítóhó Jesucrìstú, te ñá túú dàña ndéé-ndó cùu iní-ndó-gǎ. Te mee Yă Ndiöxí ío na chindee chitúu ñaha-gǎ xii-ndo. Te ducaⁿ na cùnduu. Te ío chí cǎdá ndèe iní-nǎ vitna.